

TUTÚ NÍ CADÚHA TÉ JUDÁS

Té Jùdás cádüha-dé tutú quíhíⁿ ndaha ñáyiú ní cachí Yă Ndiöxí nduu cuendá-gá

¹Yúhú té Jùdás ñaní té Jàcobó xínú cuèchi-í núú Xítóhó Jesucristú, te cádüha-í tutú-a sá cúú-xí nchòhó ñáyiú ní cachí Yă Ndiöxí Yaá cúú Tătá-ó nduu cuendá-gá, ñáyiú ío cùu iní-gá. Te dàtná-ni xìto ñaha-gá xii-ndo vitna ñu-ni ducaⁿ còto ñaha-gá xii-ndo ndèé ná sàá nduu quixi tucu Xítóhó Jesucristú ñuyíú-a. ²Te xicáⁿ táhù-í núú Yă Ndiöxí sá ïo-gá ná chindee chitúú ñaha-gă xii-ndo, te na cùtnuní-gá iní-ndó sã ïo cùu iní ñáhá-gă xii-ndo, te ducaⁿ ïo váha cuu iní-ndó cùndecu-ndo.

Ñáyiú ñá túú càháⁿ tnúhu ndáá tnúhu Yá Ndiöxí

(2 Pedro 2:1-17)

³Te nchòhó ñáyiú ío cùu iní-í, ducaⁿ-ni ïo sàni iní-í cadúha-í ìⁿ tutú sá cúú-xí-ndó cuendá danèhé ñáhà-í xii-ndo nàcuáa ní cuu ní naníhí tàhú-ó dico ñá túú cádüha-í, dico vitna quide cuendá-í sá xíní ñùhu-gá-xi cáháⁿ-í núú tütú-í sá nchòhó ío cundehe-ndo tnúhu cáháⁿ-ndó ndìhi ñáyiú, te cáháⁿ-ndó nàcuáa nduu tnúhu sàndáá iní méé-ndó, chi ñu-ni tnúhu-áⁿ ní cáháⁿ Yă Ndiöxí sá cúú-xí nchàa ñáyiú ndècu ichi-gá. Te vitna ñá túú-gă ná tnúhu càháⁿ-gá sá cúú-xí-yu, chi sa ní cáháⁿ duuⁿ-gá. ⁴Te duha càháⁿ-í núú tütú-a sá cúú-xí-ndó, chi nihí-í tnúhu sá xicá cùu ñáyiú chitnahá ñáhá xii-ndo, te ni ñà túú xíní-ndó ñă ñáyiú cùú-yu, te ñáyiú-áⁿ cùú-yu ñáyiú cùu úhú iní ñáhá xii Yá Ndiöxí. Te ìⁿ xichi núú tütú Yă Ndiöxí càchí-xi sá ñáyiú-áⁿ quíhíⁿ-yu núú ùhú núú ndàhú, te ñu-ni ñáyiú-áⁿ càchí-yu sá ïo váha iní Yă Ndiöxí ñuu xíăⁿ cuu-ni cadá-yu nchaa sá cuèhé sá dúhá. Te dàquee tíhü-yu Yá Ndiöxí Yaá ío cùnuu, ndìhi Xítóhó Jesucristú.

⁵Te nchòhó sa xíní váha-ndo nàcuáa ní quide Yá Ndiöxí ndéé sanaha dico dándacu iní ñáhà-í xii-ndo, chi dàvá-áⁿ ní queñuhu-gá ñáyiú isràél nàcióⁿ Ègiptú, te dava ñáyiú-áⁿ ñà túú ní sàndáá iní ñáhă-yu xii-gá te ní dánáá ñaha-gá xii-yu. ⁶Te nchaa espíritú ñá túú ní cuení cada ndáá cunu cuechi núú Yă Ndiöxí ní quee-xi núú ndécú-xí, te mee-gă ní sadí nihnu ñaha-gă xii-xi ìⁿ xichi núú néé te vá cãcu-xi, chi sáá nduu te nayáha-xi

JUDAS

cundecu-xi núú ùhú núú ndàhú ni caa ni quíhíⁿ. ⁷Te dándacu iní ñáhá tucu-í xii-ndo nàcuáa ní yáha ñáyiú ñuú Sòdomá, ndihí ñáyiú ñuú Gòmorrá, ndihí nchaa ñáyiú ñuú ní cáa yatni xíáⁿ, chi tnàhá-yu ñá túú ní quide váha-yu dàtná ní quide nchaa cue espíritú-áⁿ. Chi cue téé ní xóo cáháⁿ ndihí tnàha ndi mee-güedé, te ñu-ni ducaⁿ ñá xóo cada cue ñáyiú ñihí tucu. Te sá dúcáⁿ ñá quidé-yu núú ní dángóyó Yá Ndiöxí ñuhú ñuú-yu ní dánáá ñàha-gá xií-yu. Te xíáⁿ cútnùní iní-ó sá nchàa ñáyiú ñá túú cuení cada váha núú-gá quíhíⁿ-yu núú ùhú núú ndàhú ni caa ni quíhíⁿ.

⁸Te ñu-ni ducaⁿ quide ñáyiú chitnahá ñáhá xii-ndo cuení-yu dandàhú ñáhá-yu, chi càchí-yu sá dácòto ñaha saní-yu nàcuáa cada-yu, núú xíáⁿ nándi nchaa sá cuèhé sá dúhá quidé-yu sá cúú-xí yèqui cuñú-yu, te dàquee tíhü-yu nchaa nàcuáa càháⁿ Yá Ndiöxí cada-o, te càháⁿ úhú-yu cuendá nchaa espíritú cúnùu. ⁹Te mee espíritú cúnùu-gá xínú cuèchi núú Yá Ndiöxí nání Mìguél ní nàa-xi ndihí sácuíhna cuendá yèqui cuñú ndii Moisés. Te espíritú-áⁿ ñá túú ní cùyii-xi cáháⁿ úhú-xi sácuíhna-áⁿ, chi ní xáhaⁿ-ni-xi: “Mee Yá Ndiöxí nàhá-gá te núú nása cada ñaha-gá xii-n”, duha ní xáhaⁿ-xi. ¹⁰Te nchaa ñáyiú ducaⁿ dándahú ñáhá xii-ndo-áⁿ càháⁿ cuèhé-yu cuendá nchaa sá vátá cútnùní-gá iní-yu nása ndùu, te quidé-yu dàtná quidé cuè quiti chi cue quiti-áⁿ quidé-güedi nání véxi iní-güedi, te ni ñá túú cùnùní iní-güedi nchaa sá quidé-güedi. Te ducaⁿ sá tnahá-xi cùú-yu, chi nchaa sá cuèhé sá dúhá véxi iní-yu quidé-yu, te sá dúcáⁿ quidé-yu xíáⁿ tá xíta nihnú-yu cuáháⁿ.

¹¹Te ndàhú ní cuú-yu chi ío ndohó-yu!, chi quidé-yu dàtná ní quide ndii Càin. Te nándi sá quidé-yu cuendá sá cuení-yu díhúⁿ dàtná ní xóo cada ndii Bàlaám. Te ío cùu sáa iní-yu núú Yá Ndiöxí dàtná ní xóo cada ndii Còré, núú xíáⁿ tá xíta nihnú-yu cuáháⁿ. ¹²Te ñicó sácáⁿ núú sàha ñàhá-yu xii-ndo òré nàtàcá-ndó quide-ndo vico chiñuhu-ndo Yá Ndiöxí. Te òré xéxi ndihí ñàhá-yu xii-ndo te mee-ni sá cúú-xí mèé-yu quide cuendá-yu, te ñá túú nèhé-yu sá yíñuhu núú Yá Ndiöxí. Te cùú-yu dàtná ñá vícò sá cuáháⁿ-xi duha cuáháⁿ-xi dàcáⁿ te ñá túú dáu nchídó-xí, ducaⁿ sá tnahá-xi cùú-yu. Te cùu tucú-yu dàtná ñá yutnu vídí sá ñá túú tnàhí cùuⁿ sávidí-xi, te nchaa yutnu ducaⁿ ñá túú cùuⁿ sávidí-xi te tnùhu-güedé ndéé yóho-xi te xihí duuⁿ-xi. Te ducaⁿ sàtnahá-xi cùú-yu, chi ñá túú quide váha-yu. ¹³Te cùu tucú-yu dàtná ndute làmár, chi ndute-áⁿ òré càndá-xi te quecòo tíñú-xi ñá xio. Te cùu tucú-yu dàtná ñá chódíní cuáháⁿ-di duha cuáháⁿ-di dàcáⁿ. Te ducaⁿ sàtnàhá-xi cùú-yu, chi ñá túú cuení-yu cada váha-yu. Te ñáyiú-áⁿ daquíhíⁿ ñáhá Yá Ndiöxí xií-yu ñá xichi núú néé núú sá ndecu túha cundecú-yu ni caa ni quíhíⁿ.

¹⁴Te ndíquíⁿ yává ndii Àdán téé cùu usá ní xínani Ènóc ní dácáhú iní ñáhá Yá Ndiöxí xii-dé ní cáháⁿ-dé ñu-ni cuendá nchaa ñáyiú-áⁿ. Te ní

JUDAS

cachí-dé: “Na cächí tnúhu-í xii-ndo sã Yã Ndiöxí quixi-gá ndihi cuéhé víhí espíritú xínú cuèchi núú-gã. **15**Te dàvá-áⁿ cada ndáá-gá cuèchi nchaa ñáyiú te daquihíⁿ-gá nchaa ñáyiú ndècu ichi cuehé ichi duha núú ùhú núú ndàhú, te ducaⁿ càda ñaha-gá xií-yu, chi mee-ni sã cuéhé sá dúhá quidé-yu, te cãháⁿ úhú ñáhã-yu xii-gá”, duha ní cachí te Ènóc. **16**Te ñáyiú-áⁿ ïo yica ìní-yu chi ñá túú ndùu vétú ìní-yu nàcuáa ndècú-yu ñuyíú-a, te sàtnuhú-yu tnàha ñáyiú-yu te mee-ni sã cuéhé sá dúhá sàni ìní-yu quidé-yu, te quide cahnú-yu mèe-yu, te mee-ni cãháⁿ váha-yu núú tnàha ñáyiú-yu cuendá cuìní-yu sá cáda vãha ñaha ñáyiú-áⁿ xií-yu.

Té Jùdás cãháⁿ-dé dóho ñáyiú ndècu ichi Yá Ndiöxí

17Te nchòhó ñáyiú ïo cùu ìní-í, cãháⁿ ndàhú-í núú-ndó sã ïo cuhuⁿ ìní-ndó tnúhu sá sà ní dánèhé ñáhá cuè téé ní tendaha Xítóhó Jesucristú cãháⁿ tnúhu-gá núú ñáyiú. **18**Te sa naha-ndo sá ñí cachí-güedé sá cùmání-gã quixi tucu Xítóhó Jesucristú ñuyíú-a, te coo ñáyiú cáháⁿ cuéhé cáháⁿ duha cuendá tnúhu-gá. Te ñáyiú-áⁿ cadá-yu mee-ni sã cuéhé sá dúhá vèxi ìní mèe-yu. **19**Te ñáyiú-áⁿ cúú-yu ñáyiú cãháⁿ nándi tnúhu sá ñà túú nàndíhi cuendá sá vã cúú ìⁿnuu-ndo cundecu-ndo, te mee-ni sã cuéhé sá dúhá ñùhu ìní-yu, te ñá túú ndècu ndihí-yu Espíritú Yã Ndiöxí.

20Te nchòhó ñáyiú ïo cùu ìní-í, ïo dacuàha-ndo tnúhu Yá Ndiöxí sá ñí sándáá ìní-ndó cuendá ducaⁿ cuíta cuehnu nihnu-ndo ichi-gá quíhíⁿ, te cáháⁿ ndihi-ndo Yã Ndiöxí nàcuáa dàcahu ìní ñáhá Espíritú-gá xii-ndo.

21Te ïo coto-ndo mèe-ndo cundecu-ndo cuendá cuu váha ìní ñáhá Yã Ndiöxí xii-ndo, te cundetú-ndo sàá nduu quixi Xítóhó Jesucristú ñuyíú-a nacuaca ñaha-gã xii-ndo cundecu-ndo ndihi-gá ñí caa ñí quíhíⁿ, chi Yaá-áⁿ ïo cùndahú ìní ñáhá-gã xii-o.

22Te ñáyiú sàni ìⁿ sani úú ìní-xi cúñaha-ndo xíí-yu nàcuáa cadá-yu cundecú-yu ichi Yá Ndiöxí. **23**Te nchaa ñáyiú ta xíta nihnu ñùhu ichi cuáháⁿ núú ùhú núú ndàhú, ïo cundihí ìní-ndó cùñaha-ndo xíí-yu tnúhu Yá Ndiöxí cuendá sá ná cãcu nihnú-yu, te cundàhú ìní-ndó-yu, te quíhi ìní-ndó vã cáda-ndó tnàhá-ndó nàcuáa quidé-yu, chi daquèe tíhú-ndó nchaa sá cuéhé sá dúhá quidé-yu-áⁿ.

Nàcuáa ndacáⁿ táhú-ó nùú Yã Ndiöxí

24Te Yá Ndiöxí chindee ñaha-gá xii-ndo cuendá sá vã cùndecu-ndo ichi cuehé ichi duha, te cunduu ndoo cunduu nine ìní-ndó càndeca ñaha-gá xii-ndo quíhíⁿ cundecu-ndo nùú ïo váha càa ndecu-gá, te ïo cudíí ìní-ndó. **25**Te Yá Ndiöxí ïo ndècu ndihi-gá nchaa sá xíní tnùnigá te diu-gá ní dácãcu nihnu ñaha-gã xii-o nùú ùhú núú ndàhú, te ducaⁿ ñí quide ñaha-gã xii-o chi ndècu ndihi-o Xítóhó Jesucristú. Te ïo ndacáⁿ táhú-ó nùú Yã

JUDAS

Ndiöxí, chi ío cànnu cuu-gá ndécú-gă táxí tnùní-gá, te súúní vǎha iní-gá, te ndàcu-gá quídé-gă nchaa sá vǎha, te ducaⁿ-ni ïo cànnu cuu-gá ndée cútnàhá vátá ngǎva-gá ñuyíú, te ducaⁿ-ni ïo cànnu cuu-gá ndée vitna, te ðiu-ni ducaⁿ ïo cànnu cuu-gá ni caa ni quíhíⁿ, duha xìni ñuhu-xi ndacáⁿ táhú-ó nǔú-gă. Te ducaⁿ na cùnduu. Te ío chí cádá ndèe iní-nǎ vitna.